

又衆常以爲眷屬亦能遊戲須彌四天王下
層四藥又世界作無量有情利益失正道漂
曠野王賊水火等逼起悲愍心一切繫縛處
我當成就已皆今得解脫

我今已略說廣法如大經應觀自心日月形
見光明則此月中一字如金色難觀如日輪
光明普舒徧瑜岐想光明則其字爲輪其輪
爲轉輪持妙色形七寶圍遶徧身毛孔中流
出無量佛瑜岐應思惟用金剛界印四處誦
真言加持勤勇力成就念定勤爲薪焚燒一

切罪以真言色火當離疑分別求大乘樂棄
小乘樂慙懃慧菩提住真言儀則

瑜伽翳迦訖沙囉烏瑟尼沙訖訖囉真言安

怛陀那儀則一字頂輪王瑜伽經

第九

佛入涅槃密迹金剛力士哀戀經

失

譯

人

名

牟尼世尊在拘尸那城娑羅林間北首而卧
初入涅槃時密迹金剛力士見佛滅度悲哀
懊惱作如是言世尊成就最勝無上十力云

何於今乃爲羸弊無常氣勢微劣之所摧敗
如來捨我入于寂滅我從今日無歸無依無
覆無護衰惱災患一旦頓集憂愁毒箭深入
我心密迹金剛作是語已戀慕世尊愁火轉
熾五內抽割心脅磨碎躑躅悶絕譬如巖崩
巔墜于地久乃醒悟即起而坐涕哭哽噎敲
欬而言恠哉恠哉死魔大惡無量功德波羅
蜜聚爲彼死魔之所滅壞復作是言唯願眞
濟請爲我起我今薄祐無依憑處云何世尊
捨棄於我獨入寂滅自今已後永離哀顏世

尊寂靜身口意業更不可覩更不得見佛婆
伽婆入于佛住如來昔日入于佛住三昧之
時威德光顯倍常殊妙佛面鮮澤過於蓮華
新開敷時如日初出照於朝陽如是勝面更
不可見如來處於大眾出大雷音微妙之聲
更不可聞誠言無二離過患說無諂偽說易
解了說衆所愛說世界之中滅除諸惡至甘
露城無過佛法咄哉眞濟永入涅槃使諸衆
生無有救護處於生死大曠野中又無眼目
離於導師誰示其道如來密雲能雨甘露爲

無常風之所吹滅一切衆生愛火所燒而於
今者佛入涅槃誰雨法雨滅其愛火如來於
今滅於有爲得無上道爲於衆生作大醫王
一切世界爲煩惱病之所患苦今入涅槃誰
當矜憇化以正道療諸衆生結使之病如來
世尊名爲知思念於恩者我從處胎以來隨
逐如來如影隨形調和奉順不曾違闕云何
不感我之至心便見孤棄如背恩者嗚呼恠
哉咄哉大苦此金剛杵當用護誰即便擲棄
自今以往當奉侍誰誰當慈憇訓誨於我更

於何時得覩尊顏護世之王爲顯甘露故遣
我來擁護於佛如何今日卒捨我等入于涅
槃我所有命依佛而存一旦捨我當依於誰
得存此命咄哉眞濟矜憇一切常說妙法教
詔愚冥何故今者而卒不言如來所知一切
種智過一切上恒於衆生有緣之者思欲利
益即於今日何處去耶而於今日便自閉默
更不救濟受化之徒諸魔惡人見佛涅槃皆
大歡喜如來世尊生死海中作大船師而於
今日永捨濟度是諸衆生無量劫來順生死

流唯有如來能以正道今諸衆生皆得返流
如來世尊永斷煩惱爲於愚冥衆生作大照
明今自涅槃世間衆生增長黑闇永爲無明
之所覆蔽金剛密迹哀呼悲惱復作是言世
尊三十二百福大人相悉皆具足如何滅壞
永不可覩哀哉破壞魔者哀哉轉法輪者哀
哉滅一切外道螢火光者哀哉能壞有身者
哀哉諸智慧城者哀哉法燈爲無常風之所
吹滅哀哉法月爲死羅睺之所吞滅復作是
言大寂真濟願爲我說即於今者爲何處去

慨九

十二

至何方所爲適何國爲至舍衛及王舍城迦
毗羅衛波羅柰耶於此諸國爲何處住耶今
爲在何林爲在迦蘭陀竹林菴婆羅林祇陀
林於此諸林爲在何處爲在何山爲在白塔
山毗提鹽山耆闍崛山於此諸山爲在何山
願語於我實在何處諸八部衆天龍夜叉乾
闥婆阿脩羅迦樓羅緊那羅摩睺羅伽如是
等以見於我常隨從佛設當問我佛何處去
我當何辭以對於彼世尊昔日教化衆生若
小疲倦暫寢息時繫心在明爲益衆生云何

今者捨於一切永入涅槃更不利益真濟願
爲我起我憂悲火熾然曾中命將不全願賜
一言猶如冷水滅我熾火我今爲憂苦毒蛇
之所蛆螫願賜我法阿伽陀藥以除我毒憂
愁毒箭深入我心願賜語鉗爲我拔出一切
衆生愛別離苦廿九如來常爲說種種法除其苦
惱云何獨不愍我爲我滅此衆苦如我今者
哀逆闇塞不能推理而自釋割憂心內病說
種種語云何世尊不見慰喻我之恭順心不
疲怠樂見慈顏無有厭足投身于地願一瞻

視如何世尊不見哀矜滅結牛王常挾持我
何不將我入於涅槃獨見孤棄我失如來諸
苦所切無量無邊又不見諦何故獨見放捨
入于涅槃恠哉恠哉如來一睡更不起耶如
來已去不復還耶猶如燈滅更不復明如寶
樓崩更不建立如寶藏沒不可還出舉手大
叫發聲悲哭如帝釋幢所持繩絕倒地不起
宛轉涕哭心肝咽喉舌悉皆乾燥荒迷躡
地良久乃蘇愛戀如來功德之身捉相輪足
急抱不放而作是言如來之足如優鉢羅華

如日初出清淨柔軟安立之足千輻輪足極
妙工巧不能畫作轉輪聖王雖有是相相不
明了如來相輪輻轂具足炳然顯著其指纖
長附順相著不稀不踈其爪紅潤猶如赤銅
手足網縵猶如鵝王肌體豐滿無筋脉皮皺
天王人王諸鬼神王及以龍王咸以天冠頂
禮佛足爲化一切諸有緣者以相輪足徧行
世界而今此足更無有用我於昔日心常喜
樂一旦涅槃更不令我生於喜樂而此無常
極爲大惡能壞無量功德不思議色如來威

勢能令見者身心歡喜無量福力持如來身
無常之力實爲最大能使如來至於死處如
來以父母乳哺之力禪定力智慧力神通力
以此諸力不能於無常力中而自拔濟阿難
昔日勸請世尊住壽一劫如來何故不受其
請真濟往昔於三阿僧祇劫中作百千苦行
難捨之事一切能捨無數劫中歷侍諸佛奉
事供養求一切智欲濟衆生於少許時所度
未幾便入涅槃如來往日爲菩薩時化於衆
生猶不疲極而於今者可疲倦耶濁法衆生

如新生犢滿十二旬云何斷乳而棄之去請
爲我起與濁法犢飽足甜乳于時帝釋數億
諸天求欲問難云何而不爲其解說千世界
主梵天王合掌請法今日何不爲說法要滿
其所願毗沙門王數千萬夜又而自圍遶提
頭賴吒乾闥婆衆而自圍遶毗留勒叉鳩槃
荼衆而自圍遶毗留博叉諸龍之衆而自圍
遶如是等衆皆爲飲法甘露而來至此如來
何不以良藥救諸疾者外道諸衆毀咎於法
何不速起壞彼邪論欲界之主處處壞亂何

不降伏如來諸聲聞少於智慧不勤習誦默
於廣博何不速起爲說略要令知正道然今
阿難是佛所親奉侍世尊未斷結使盡於根
本何不教授令盡諸結使嗚呼惟哉如此堅
實大福德人一旦滅壞而此無常如護財象
既九
殘害無數此護財象身大如山如來往昔猶
十五
能調伏如是大象云何今者反爲無常之所
調伏乃至滅盡如阿婆羅龍能壞摩竭提興
大雲雷電光熾然降注大雹摧折樹木如來
能伏彼大力龍而於今者反爲無常之所乘

服如鷲掘魔暴虐殘害猶能調彼剛強惡人
調彼不調牟尼世尊今爲無常之所摧壞如
曠野惡鬼殘殺一切令國空虛猶能調彼使
受持戒而於今者入無常網摧滅無餘如優
樓頻螺迦葉深著於我沒於邪見榛林之中
難可拔出如來猶慙能現十八種神足變化
能令調伏今爲無常之所傾倒一切衆生薄
於福祐大智之海爲無常日之所乾竭正智
須彌爲無常金剛杵之所摧碎佛功德樹覺
意妙華道果充滿爲無常斧之所斫壞廣大

智光名稱周聞徧于世間能燒一切有生之
薪爲無常水之所澆滅也盛力無常無有法
教不爲智者之所禁制非是精進膽勇猛健
勢力名稱柔心調根寂定之所能免咄哉無
常酷暴乃爾不別好惡有德無德等能摧壞
作是語時大地震動山頂崩壞大星隕落四
方火起日月諸宿無有光色一切天人皆無
歡樂我今形體不自勝舉欲沒入地瞑眩黃
黑心意錯亂忘失所念脣乾舌燥語言錯謬
聲音嘶破去死不遠命今必絕佛捨而去如

是等衆種種哀呼百千種言戀慕於佛帝釋
語言止止已足汝今可不憶念大仙少語佛
告比丘諸行無常無得住者不可體信是變
易法一切聚集歸散會滅高者必墮合會必
離有生必死一切諸行猶如河岸臨寂之樹
亦如畫水尋畫尋滅亦如泡沫如條上露不
得久停如乾闥婆城暫爲眼對人命迅速疾
於射箭速行天下疾於日月人命速疾過於
是天無常敗壞應當解知若於佛事有不足
者不入涅槃佛事周訖乃入涅槃以此佛法

付囑人天以此重事與聲聞弟子向無畏寂
滅處去諸有苦盡更不受生汝等不應生大
憂惱

佛入涅槃密迹金剛力士哀戀經
佛使比丘迦旃延說法改盡偈經

失 譯 人 名

一百二十章

尊者迦旃子 體道修律護 見諸卒暴者
以偈開法路 心當懷愴恨 思惟悲感事